

ጳውሎስ ኤፌሶና አሳስ ፃፊዳ ኪታ ጋሳ ቆፋ

ጳውሎስ ኤፌሶናን ዳዒያ አሳስ ፃፊዳ ኪታን ኡባሬ አሉዲ ፃሊዳባይ፡ «ዎዴይ ጋኪያ ዎዴ ያሳይ ፖላናው ቆፒዳ ቆፋይ፡ ሳሎኒኔ ሳባን ዳዒያ ሜዴቴላ ኡባይ ኪሪስቶሳፔ ጋርሳን ጊዳና ማላሳ» ያጊያ ቆፋ (1:10)። ሄሳ ቦላ ጉጂዲ ዬሱስ ኪሪስቶሳራ ዳዒያ ኢሲፊቴላን፡ አሳ ዜሬላ ኡባይ ኢሲኖ ጊዳና ማላ ሃ ጊታ ቆፋ ኦሶን ፔሻና ማላ ያሳ አሳ ሃሳዪሴስ።

ኤፌሶና ኪታ ኮይሮ ኪፊሊያን ፃፊይ ካራ ቆፋ ጊዲዳ ኢሲፊቴላባ ፃፋናው ደሚዳይሳ ዳልጊሲዲ፡ ያሳ አዎይ ባ አሳ ዋቲ ዶሪዳኮ፡ ኤንቲካ ኢያ ናባ፡ ዬሱስ ኪሪስቶሳን ባንታ ናጋራፔ ማርታ ዳሚዲ ዋኒዲ ላባ ኬዪዳኮኔ፡ ያሳ ጊታ ኡፋይሳ ቃላይ ጌሻ አያና ባጋራ ቱማ ጊዳይሲ ኤሬቲዳኮ ኦዴስ። ናምባንሉ ኪፊሊያን ቃሲ ፃፊይ ሃ ኪታ ናባቢያ አሳይ ባንታ ኢሲፊቴላ ዴዑዋን ኪሪስቶሳን ኤንታው ዳዒያ ኢሲፊቴላይ ቱማ ጊዳና ማላ ኤንቲ ዋኒዲ ዳናው ቤሲያኮ ቆፊሴስ።

አሳይ ኪሪስቶሳን ዳዒያ ኢሲፊቴላ ዋኒዲ ዳናው ቤሲያኮ ዲማ ዲማ ሌሚሶን ቆንጨስ። ዎሳ ኬላ አሳቴላ ሌሚሶ ጊዲያ ዎዴ ኪሪስቶሲ ሄ አሳቴላስ ሁዔ። ዎሳ ኬላ ጊምቤ ኬላን ሌሚሴቲያ ዎዴ ኪሪስቶሲ ሄ ኬላ ጎዳ ፃጹዋ ሚንሊያ ዋና ሹቻ። ዎሳ ኬላ ማቺን ሌሚሴቲያ ዎዴ ኪሪስቶሲ አዚናን ሌሚሴቲስ። ፃፊይ ኪሪስቶሳ ባጋራ ቆንጨዳ ያሳ አጾ ኬሃቴላ ዳሮ ናሺዲ ኦዲሼ፡ ጊዳይ ጨዋቲያ ሃሳያ ሃሳዬስ። ኢ ኡባባ፡ ኪሪስቶሳ ሲቁዋ፡ ኢያ ያርሼቴላ፡ ኢ ኢሚዳ ናጋራ አቶቴላ፡ ኢያ አጾ ኬሃቴላኔ ኢያ ጌሻቴላ ባጋራ ፃሊስ።

ኤፌሶና ኪታ አይፌ ቆፋታ

- ሳርሶ 1:1-2
- ኪሪስቶሳኔ ዎሳ ኬላ 1:3-3:21
- ኪሪስቶሳን ዳዒያ ኦራላ ዴዑዋ 4:1-6:20
- ኩሻ ቆፋ 6:21-24

1 ያሳ ሹኔን ኪሪስቶስ ዬሱሳ ሃዋሬ ጊዲዳ ጳውሎሳፔ፡ ኤፌሶናን ዳዒያ ጌሻታሲኔ ኪሪስቶስ ዬሱሳ አማኔይሳታስ ፃፊቲዳ

ኪታ።

² ጾሳ ኑ አዋፔኔ ጎዳ ዬሱስ ኪሪስቶሳፔ አጾ ኬሃቴላይኔ ሳሮቴላይ ሂንቴው ጊድ።

ኪሪስቶሳን ዳዒያ አያና አንጂዋ

³ ሳሎን ዳዒያ አያና አንጂ ኡባን ኪሪስቶሳ ባጋራ ኑና አንጂዳ፣ ኑ ጎዳ ዬሱስ ኪሪስቶሳ አዋይ፣ ጾሳይ ጋላቴቶ። ⁴ ኑኒ ኢያ ሲንላን ጌሻታኔ ቦሪይ ባይናይሳታ ጊዳና ሜላ ጾሳይ አላሚይ ሜዴታናፔ ካሴ ኪሪስቶሳ ባጋራ ባ ሲቁዋን ኑና ደሪስ። ⁵ ጾሳይ ባ ሼኒያን ባ ደሲዳይሳዳ ዬሱስ ኪሪስቶሳ ባጋራ ኑና ባ ናይታ አላናው ካሴቲዲ ቆፒ ዋሊስ። ⁶ ጾሳይ ባ ሲቁያ ናና ባጋራ ኑስ ጮ አሚዳ አጾ ኬሃቴላይ ቦንቸታና ሜላ ሃሳ ኦሊስ።

⁷ ጾሳ አጾ ኬሃቴላ ዲሬቴላዳ ኪሪስቶሳ ሱላን ዋዜቲዲ ናጋራ አቶቴላ ዳሚዳ። ⁸ ባ አጾ ኬሃቴላ ጨንጫቴላኒኔ ኤራቴላን ኩንሊዲ ኑስ አሚስ። ⁹ ጾሳይ ባ ደሲዳይሳዳ ኪሪስቶሳ ባጋራ ኢያ ሼኒያ ፀራ ኑ ኤራና ሜላ ኦሊስ። ¹⁰ ዋዴይ ጋኪያ ዋዴ ጾሳይ ፖላናው ቆፒዳ ቆፋይ፣ ሳሎኒኔ ሳባን ዳዒያ ሜዴቴላ ኡባይ ኪሪስቶሳፔ ጋርሳን ጊዳና ሚላሳ።

¹¹ ኡባባ ባ ሼኒያዳ ኦሊያ ጾሳይ፣ ካሴቲዲ ባ ቆፒ ዋሊዳይሳዳ ኪሪስቶሳ ባጋራ ኑኒ ኢያባ ጊዳና ሜላ ኑና ደሪስ። ¹² ሃሳ ኢ ኦሊዳይ፣ ኪሪስቶሳን ኡፋይሲ ዋሊዲ ናጎን ኮይሮ ጊዲዳ ኑኒ ጾሳ ቦንቸዋ ጋላታን ቆንጨሳና ሚላሳ። ¹³ ሂንቴካ ሂንቴ አቶቴላ ዋንጌላ፣ ሄሲካ ቱማ ቃላ ሲዒዳ ዋዴ ኪሪስቶሳ አሚኒዴታ። ጾሳይ ሂንቴው አማና ጊዳ ጌሻ አያናን ሂንቴ አታሜቲዴታ። ¹⁴ ጾሳ ቦንቸይ ጋላቴታና ሜላ ጾሳይ ባ አሳ ዋዛና ጋካናው ጌሻ አያና ኑስ ኦይሉ ኦሊዲ አሚስ።

ጳጢራሳ ዋሳ

¹⁵ ሃሳ ጊሾ፣ ጎዳ ዬሱሳ ሂንቴ አማኔይሳኔ ጌሻታ ኡባ ሂንቴ ሲቁይሳ ታ ሲዒዳ ዋዴ ¹⁶ ታ ዋሳን ሂንቴና ቆፓሼ ሂንቴ ጊሾ ጾሳ ጋላቴይሳ አጋቢኬ። ¹⁷ ጎዳ ዬሱስ ኪሪስቶሳ ጾሳይ፣ ቦንቸ አዋይ፣ ጾሳ ሂንቴ አሊ ኤራናዳ ጨንጫቴላኔ ቆንጨላ አያና ሂንቴው አማናዳ ታኒ ጾሳ ዋሳይስ። ¹⁸ ጾሳይ ሂንቴና ጂጊዳ ኡፋይሳይኔ ጌሻቲ ላቲያ ቦንቸ ላታይ አይ ሜላ ዳሮኮ ሂንቴ ኤራና ሜላ ጾሳይ ሂንቴ ዋዛና አይፊያ ዳያና ሜላ ታኒ ጾሳ ዋሳይስ።

¹⁹ ቃሲ ኢያ አሚኒያ ኑናን ኦሊያ ኢያ ዋልቃይ አይ ሜላ አዲዳ ጊቴኮ ሂንቴ ኤራና ሜላ ዋሳይስ። ሄ ዋልቃይ ጾኑቶናኔ

ደቡብና ዋልቃ። ሃ ኑናን ደዒዲ ኦሊያ ዋልቃይ፤ 20 ከሪስቶሳ ሃይቆፔ ደንሉዲ፣ ሳሎን ያሳፌ ኡቫቻ ባጋራ ኡቲሲዲ ገታ ዋልቃይ ኢሲኖ። 21 ኢያ ሱንላይ፣ ኣይሴይሳታፔኔ ማታ ኣዋታፔ፣ ሃሪይሳታፔኔ ጎዳታፔ፣ ቦላ ገዲዲ ሃ ኣላሚያ ፃላላን ገደናሺን ሲንሳፌ ያና ኣላሚያንካ ሃራ ሱንሳታ ኡባፌ ጶቃ። 22 ያሳይ ኡባ ከሪስቶሳ ቶሁዋፔ ጋርሳን ሃሪሲሰ፤ ቃሲ ዋሳ ኬላን ኡባባን ጎዳ ገደና ማላ ኢያ ሹሚስ። 23 ዋሳ ኬላይ ከሪስቶሳ ኩሜላ ኦሊያ ኢያ ኣሳቲላ። ሜጴቲላይ ደዒያ ቤሳ ኡባን ከሪስቶሲ ባ ሁዒን ኡባባ ኩንሌይሳ።

2

ከሪስቶሳን ሃይቆፔ ደዎ ፒኔላ

1 ሃይሳፌ ካሴ ሂንቲ፣ ሂንቲ ናጋራኔ ሂንቲ ቆሁዋ ጋሶን ሃይቁዳይሳታ። 2 ሄ ዋዴ ሂንቲ ሃ ኣላሚያ ኢታ ኦጊያ ካሊዴታ። ጫርኩዋ ቦላ ደዒያ ኣያና ዋልቃታ ሃላቃሲኔ ሃላካ ያሳሰ ከቲቶና ኣሳ ሃሪያ ኣያናሰ ከቲቲዴታ። 3 ኑ ኡባይካ ካሴ ሄ ኣሳታ ገደን ኑ ኣሾ ኣሙዋኔ ኑ ዋዛና ሺኒያ ካሊዲ ደዒዳ። ኑካ ሃራታ ማላ ኑ ሜጴቲላን ያሳ ሃንቁዋ ኤካናው ደዒይሳታ።

4 ሺን ያሳ ገታ ማሮቲላፌኔ ኑስ ደዒያ ገታ ሲቁዋፔ ደንዲዳይሳን፣ 5 ሃሪ ኣቶሺን ኑኒ ኑ ቆሁዋን ሃይቁዲ ደዒሺን ከሪስቶሳ ባጋራ ኑስ ደዎ ኢሚስ። ሂንቲካ ኣቲዳይ ያሳ ኣጶ ኬሃቲላና። 6 ያሳይ ኑና ከሪስቶሳራ ኢሲፌ ሃይቆፔ ደንሉዲ ሳሎ ሲሁዋን ኢያራ ኢሲፌ ዋሊስ። 7 ኢ ሃሳ ኦሊዳይ፣ ከሪስቶሰ ዩሱሳ ባጋራ ኑስ ቆንጨሲዳ ባ ኬሃቲላኔ ዛዊ ባይና ባ ኣጶ ኬሃቲላ ዲሬቲላ ያና ላይላን ኑና ቤሳናሳ። 8 ሂንቲ ኣጶ ኬሃቲላን ኣማኖን ኣቲዴታ። ሄሲካ፣ ያሳ ኣሞታፔ ኣቲን ሂንቲ ኦሶን ቤንቲዳባ ገደና። 9 ኦኒካ ጩቁቶና ማላ ኣቶቲላይ ቤንቲዳይ ኦሶን ገደና። 10 ኑኒ ያሳ ሜጴቲላ፤ ኢ ኑስ ካሴቲዲ ገገሲ ዋሊዳ ሎዎ ኦሶታ ኦላና ማላ ከሪስቶሰ ዩሱሳ ባጋራ ኦራሊ ሜጴቲዳ።

ከሪስቶሳራ ደዒያ ኢሲፌቲላ

11 ሃሳ ገሹ፣ ሂንቲኖ ዩሌታን ኣይሁዴ ገደናይሳቶ፣ ኣይሁዴቲ ባንታው ኣሳ ኩሺን ቃፃሬቲዲ፣ ሂንቲና ቃሲ ቃፃሬቲቦናይሳታ ገዲ ጭይሳ ኣኬኪቲ። 12 ሄ ዋዴ ሂንቲ ከሪስቶሳፔ ሻኬቲ ደዒዳይሳ፣ ኢሰራዔሌ ኣሳሰ ኣላጋ ገዲዲ ደዒዳይሳ፣ ያሳ ኡፋይሳ ቃላፔ ሃኪዲ ደዒዳይሳኔ ሃ ኣላሚያን ኡፋይሲኔ ያሲ ባይና ደዒዳይሳ

1:20 ማዘ 110:1 1:22 ማዘ 8:6፤ ቆላ 1:22-23፤ 1:18 2:1 ቆላ 2:13

አክኪቱ። 13 ሺን ሂንቴ ካሴ ሃኪዲ ዳዒዳይሳቲ፣ ሃዒ ኪሪሰቶስ ዩሱሳን ዳዒዲ ኪሪሰቶሳ ሱፋን ማታ ሺቂዳታ።

14 ኪሪሰቶሱ ኑ ሳርቴፋ፤ ኢ ኣይሁዳኔ ኣይሁዳ ጊደና ኣሳ ቲሚዲ፣ ናምዓ ሻኪ ዎሊዳ ሞርኬቴፋ ጎዳ ላሊሰ። 15 ኢ ባናን ሃ ናምዑ ዛሬታፔ ኢሲ ኦራፋ ኣሴ ሜዲዲ፣ ሂጊያ ኢያ ኪታራኔ ዎጋታራ ኢሲፌ ባ ኣሳቴፋን ዳይሲዲ ሳርቴፋ ኢሚሰ።

16 ኪሪሰቶሱ ማሰቃሊያ ቦላ ሃይቂዲ ሞርኬቴፋ ዳይሲሰ፤ ቃሲ ናምዑ ዛሬታ ኢሲ ኣሳቴፋ ኦሊዲ ያሳራ ሲጌሊሰ። 17 ኪሪሰቶሱ ዩዲ፣ ያሳፌ ሃኪዲ ዳዒያ ሂንቴው፣ ቃሲ ማቲዲ ዳዒያ ኤንታው ሳርቴፋ ዎንጌላ ኦዲሰ። 18 ኑ ኡባይ ኢያ ባጋራ ኢሲ ኣያናን ኣዎ ሲንፍ ሺቃናው ዳንዳዎስ።

19 ሂዛፔ ሂንቴ ኣላጋ ዎይኮ ኢማፍ ጊዳኬታ፣ ሺን ሂንቴ ሃዒ ጌሻታ ቢታ ኣሴኔ ያሳ ሶ ኣሰ። 20 ሂንቴ ሃዎሬቲኔ ናቤቲ ባሲዳ ባሱዎ ቦላ ኬፃቲዳታ። ጎዳ ፃጶዎ ሚንሊያ ሹቻይ ኪሪሰቶስ ዩሱሳ። 21 ኢያን ኬፋ ኡባይ ኢሲፌ ኦይኬቲዲ ጎዳን ጌሻ ያሳ ኬሊ ጊደናው ዲጩሰ። 22 ሂንቴ ቃሲ ያሳይ ባ ኣያናን ዳዒያ ኬሊ ጊደናው ኪሪሰቶሳን ኢሲፌ ኬፃቲታ።

3

ኣይሁዳ ጊደና ኣሳሰ ሃዎሬ ጊዲዳ ጳዔሎሳ

1 ሄሳ ጊሾ፣ ታኒ፣ ጳዔሎሲ፣ ኣይሁዳ ጊደና ሂንቴ ጊሾ ኪሪሰቶስ ዩሱሳን ቃሾ ኣሲ ጊዳሰ። 2 ታ ሂንቴና ማዳና ሜላ ያሳይ ባ ኣጵ ኬሃቴፋን ታው ኢሚዳ ሃ ኦሱዋባ ሂንቴ ሎይሊ ሲዒዳታ። 3 ታ ሂንቴው ካሴ ቃንፋን ፃፊዳይሳዳ ያሳይ ባ ፁራ ቆንጩፋን ታው ቆንጩሲሰ። 4 ታ ፃፊዳይሳ ሂንቴ ናባቢያ ዎዳ ኪሪሰቶሳ ፁራ ታ ኣይ ሜላ ኤሪዳኮ ሂንቴ ኣኬካናው ዳንዳዎታ። 5 ሃ ፁራይ ጌሻ ሃዎሬታሲኔ ናቤታስ ሃዒ ኣያና ባጋራ ቆንጩዳይሳዳ ቤኒ ዎዳ ኣሳሰ ሄሳዳ ቆንጩሲቤና። 6 ፁራይ ሃይሳ፣ ኣይሁዳ ጊደና ኣሳይ ዎንጌላ ባጋራ ኢሲሲሲታራ ኢሲፌ ያሳ ኣንጂዎ ላቶሶና። ኢሲራዔሌታራ ኢሲ ኬፋ ኣሲ ጊደሶና፤ ኪሪሰቶስ ዩሱሳን ባጋራ ያሳ ኡፋይሳ ቃላ ኤኮሶና።

7 ያሳይ ባ ኦሊያ ዎልቃ ባጋራ ታው ኢሚዳ ኣጵ ኬሃቴፋን ሃ ዎንጌላሰ ኦሳንቾ ጊዳሰ። 8 ታኒ ጌሻታ ኡባፌ ላፋ ጊዲኮካ ኣይሁዳ ጊደና ኣሳሰ ዛዊ ባይና ኪሪሰቶሳ ዲሬቴፋ ዎንጌላ ኦዳና ሜላ ሃ ኣጵ ኬሃቴፋይ ታው ኢሚቲስ። 9 ቃሲ ካሴ ዎዲያን

2:15 ቆላ 2:14 2:16 ቆላ 1:20 2:17 ኣሳ 57:19 3:4 ቆላ 1:26-27

ኡባ ሜዲያ ያሳን ቆሴቲዲ ዳዲያ ፀራሰ፣ ያሳ ቆፋይ ኣይቤኮ ቆንጨሳናው ኣጵ ኬሃቴላይ ታው ኢሚቲሰ። 10 ያሳይ ሄሳ ኦሊዲይ ሃዲ ዋዲያን ዋሳ ኬላ ባጋራ ሳሎ ሰሁዋን ዳዲያ ሃላቃታሲኔ ሃራይሳታሰ ባ ዲማ ዲማ ቆንጨፍ ኤሪሳናሳ። 11 ያሳይ ባ ሚሪና ቆፋ ኑ ጎዳ ኪሪሰቶሰ ዬሱሳ ባጋራ ፖላናው ሄሳ ኦሊሰ። 12 ኑ ኣማኖን ያሽ ባይና ያሳኮ ሺቃና ሜላ ኪሪሰቶሲ ኑሰ ሚናቴሊኔ ላዓቴሊ ኢሚሰ።

13 ታኒ ሂንቴ ጊሾ ዋዬ ኤኪያ ጊሾ ሂንቴ ታ ዋያን ዬላቶናዳ ሂንቴና ዋሳይሰ፤ ታኒ ሂንቴ ቦንቹዋሰ ዋዬታይሰ።

ኤፌሶና ኣሳሰ ዋሴቲዳ ዋሳ

14 ታኒ ኣዋ ሲንሳን ጉልባታዳ ዋሴይ ሄሳ ጊሾሳ። 15 ሳሎኒኔ ሳዓን ዳዲያ ኢሲ ኢሲ ሶ ኣሳይ ኢያን ሱንጮቴሰ። 16 ያሳይ ባ ቦንቹ ዲሬቴላፌ ሂንቴ ጋርሳ ኣሳቴላ ሚንሊያ ዋልቃ ባ ኣያና ባጋራ ኢማና ሜላ ሂንቴው ዋሳይሰ። 17 ቃሲ ኣማኖን ኪሪሰቶሲ ሂንቴ ዋዛናን ዳና ሜላኔ ሂንቴ ሰቆን ፃጶ ዬዲዲ ሚኒዲ ዳና ሜላ ዋሳይሰ። 18 ሄሳዳካ፣ ኪሪሰቶሳ ሰቆይ ኣይ ሜላ ዳልጌኮ፣ ኣዲሴኮ፣ ጵቁኮኔ ጨዋኮ ጌሻታ ኡባራ ኤሪያ ዋልቃ ሂንቴ ኣኩካና ሜላ ዋሳይሰ። 19 ኤራቴላፌ ኣጲያ ኪሪሰቶሳ ሰቆዋ ሂንቴ ኤራና ሜላ ቃሲ ዳዎ ኢሚያ ያሳ ዋልቃን ሂንቴ ኩማና ሜላ ታ ዋሳይሰ።

20 ሂዛ፣ ኑ ጊደን ኦሊያ ባ ዋልቃ ባጋራ ኑኒ ዋሴይሳፌ ዋይኮ ቆቴይሳፌ ኣሊዲ ኦላናው ዳንዳዲያ ያሳሰ። 21 ዋሳ ኬላኒኔ ኪሪሰቶሰ ዬሱሳን ዋዴ ኡባን ሚሪናፔ ሚሪና ጋካናው ቦንቹይ ጊዶ። ኣሚንዒ።

4

ኪሪሰቶሳራ ዳዲያ ኢሲፌቴላ

1 ሂዛ፣ ጎዳ ጊሾ ቃሽቲዳ ታኒ፣ ሂንቴ ፃጌቲዳ ፃሳሰ ቤሲያ ዳዎ ዳና ሜላ ሂንቴና ዋሳይሰ። 2 ሂንቴ ኡባ ዋዴ ኣዳኔ ሃዮ ጊዳቲ፤ ኢሶይ ኢሱዋ ዳንዳዲቴኔ ሰቆን ዳዲቴ። 3 ሳርቴላን ቃሽቲዲ ኣያናይ ኢሚያ ኢሲፌቴላ ናጋናው ሚኒቲ። 4 ያሳይ ሂንቴና ፃጌዳ ዋዴ ኢሲ ኡፋይሳሰ ፃጌዳይሳዳ ኢሲ ኣሳቴሊኔ ኢሲ ኣያኒ ዳዴሰ። 5 ኢሲ ጎዳይ፣ ኢሲ ኣማኖይኔ ኢሲ ፃንቃቴይ ዳዴሰ። 6 ኡባፌ ቦላ ጊዲዳ፣ ኡባ ባጋራ ኦሊያኔ ኡባ ጊደን ዳዲያ ኢሲ ያሳይ፣ ኡባ ኣዋይ ዳዴሰ።

4:2 ቆላ 3:12-13

7 ሺን ከሪስቶስ አማናው ኮዩዳይሳዳ ኑ አሶይ አሶይ ዲማ ዲማ አሞታ ኤኪዳ። 8 ሄሳ ገሾ፣ ያሳ ቃላይ፡

«ኢ ፑዴ ኬዩዳ ዎዴ ዲዔቲዳ ዳርታ ባራ ኤኪዲ ቢሰ፤ አሳሰካ አሞታ አሚሰ»

ያጌሰ። 9 ያተን፣ «ፑዴ ኬዩሰ» ጉሳይ ዎይ ጉሴ? ኢ ኮይር ዲጌ፣ ሳሳ ዚቃ ቤሳ ዎጲሰ ጉሱ ገደና አጻኮ አይ ጉሴ? 10 ሃ ዲጌ ዎጲዳይሲ፣ ኡባ ቤሳን ቤንታናው ኡባፌ ጶቃ ሳሉዎ ኬዩዳይሲ ኢያ።

11 ኢ አሶታ አሶታ ሃዎሬታ፣ አሶታ አሶታ ናቤታ፣ አሶታ አሶታ ዎንጌላ ሳባኬታ፣ አሶታ አሶታ ዎሳ ኬሌ ሄሚይሳታ፣ አሶታ አሶታ አሰታማሬታ ኦሌዲ አሚሰ። 12 ኢ ሄሳ ኦሌዳይ ከሪስቶሳ አሳቴሌ ገዲዳ ዎሳ ኬሌ ዲቻናወኔ አማኒያ አሳ ያሳ ኦሶስ ገገሳናሳ።

13 ሄሳዳካ፣ ኑ ኡባይ ያሳ ናሳ ኤሪዲ አማናን ቤንቲያ አሲፌቴላኮ ጋኪዲ፣ ከሪስቶሳ አያና ዴዑዎ ኩሜላ ጋኪዲ ዲጫና ሜላሳ።

14 ሂዛፔ ጉዬ፣ አሳ ጌኔ ጨሞን ገገዳ ባሌሌያ ዎርዶ ቲሚርቲ ጫርኮኒኔ ሆቤን ጌዴኔ ሃ ኩሎ ካዲያ ናይታ ሜላ ገደናው ቤሰና። 15 ሺን ኑኒ ቱማ ሲቆን ኦዲሾ አሳቴላሰ ሁዔ ገዲያ ከሪስቶሳራ ዴዲያ አሲፌቴላ ጉጂ ጉጂ ዲቾሰ። 16 ኩሜላ አሳቴላይ ከሪስቶሳ ቦላ ዜምፔሰ ቃሲ ዲማ ዲማ አሳቴላ ቢለቲቲ አሶይ አሱዎራ ኦይኬቲዲ ኡቲሰ። አሲ አሲ አሳቴላ ከፊሌይ ባ ኦሱዎ ኦሌያ ዎዴ ኩሜላ አሳቴላይ ሲቆን ዲጩሰ።

ከሪስቶሳን ኦራላ ዴዎ

17 ሄሳ ገሾ፣ ታኒ ሃይሳ ሂንቲው ጎዳ ሱንላን ኦዳይሲኔ ማርካታይሰ። ጎዲ ባይና ቆፋ ቆጊያ አይሁዴ ገደና አሳታዳ ዴዎጊቲ። 18 ኤንታ ቆፋይ ጶሚሰ፤ ባንታ ዎዛና ሙሚሲዶሶና። ኤንቲ ኤራቴላ ጳዮኒኔ ኢፃሰ ገዲ ያሳይ አሚያ ዴዑዎፔ ሃኪዶሶና። 19 ኤንቲ ዬላ ገያባ ኤርኮና፤ ኤንቲ ላይማቴላሰ ባንታና አሌ አሚዶሶና፤ ቃሲ ቱናባ ኡባ ጉዬ ጎና ኦሶሶና።

20 ሺን ሂንቲ ከሪስቶሳ ኤሪዳይ ሄሳ ሜላ ኦጌን ገደና። 21 አያባ ቱማ ሲዲዳታ። ቃሲ ዬሱሳን ዴዲያ ቱማ ሜላ አያፔ ታማሪዴታ። 22 ሂንቲ ካሴ ዴዲያ ዴዎ ኦጊያ ኦጊቲ። ቃሲ ባ ጨሚያ አሞን ጳያ ሂንቲ ጨጋ አሳቴላ ዲጊቲ። 23 ሂንቲ ዎዛና ቆፋን ኦራዲቲ። 24 ቱማ ሳሎቴላኒኔ ጌሻቴላን ያሳ ለሚሶን ሜጴቲዳ ኦራላ አሳቴላ ማዒቲ።

4:8 ማዝ 68:18 4:16 ቆላ 2:19 4:22 ቆላ 3:9 4:24 ሜጴ 1:26፤ ቆላ 3:10

25 ሂዛ፣ ዋርዶ ኦዳቶፊቴ። ኩኒ ኡባይ ከሪሰቶሳ ኣሳቴላ ቢሊቴታ ጊዲያ ጊሾ ኣሳ ኡባራ ቱማ ኦዳቴቴ። 26 ሃንቁቴቴ፣ ሺን ሂንቴ ሃንቁዋን ናጋራ ኦሎፊቴ። ሂንቴ ሃንቁቴ ዳዒሺን ኣዊ ዉሎፎ። 27 ፃላሂስ ቤሴ ኢሞፊቴ። 28 ካይሲያ ኡራይ ሂዛፔ ጉዬ ካይሶቶፖ። ሺን ማንቆታ ማዲያባይ ኢያው ዳና ማላ ባ ኩሺን ሎዖባ ኦሎ።

29 ሂንቴ ደናፔ ኢታ ቃሊ ኬዮፖ። ሺን ሲዔይሳታ ጎዳና ማላኔ ሃራታ ማንሌሌያ ኮሺያ ሎዖ ቃሊ ሂንቴ ደናፔ ኬዮ። 30 ያሳይ ሂንቴና ዋዚያ ጋላሳስ ሂንቴና ኣታሚዲ ዋሊዳ ያሳ ኣያና ኣዛንሶፊቴ። 31 ጫማቴላ፣ ዪሎ፣ ሃንቆ፣ ዋሶ፣ ጫሺኔ ኢታ ኡባ ሂንቴፊ ሃሲቴ። 32 ኣሊዲ ኢሶይ ኢሱዋስ ኬሃን ቃዴቴይሳታ ጊዲቴ። ያሳይ ከሪሰቶሳ ባጋራ ሂንቴው ኣቶ ጊዲይሳዳ ሂንቴካ ዋሊስ ኣቶ ጊቴ።

5

1 ሂዛ፣ ያሳይ ደሲያ ናይታዳ ኢያ ዳኒቴ። 2 ከሪሰቶሲ ኩና ደሲዲ ባና ኩ ጊሾ ያሳስ ሳዊያ ኢሞኔ ያርሾ ኦሊዲ ኢሚዳይሳዳ ሂንቴካ ሲቆን ዳዒቴ።

3 ሺን ላይማቴላ፣ ቱናቴላኔ ኡዜቴላ ኣማኒያ ኣሳስ ቤሶና ጊሾ ሂንቴ ጊደን ኡባራካ ሲዔቶፎ። 4 ያሳ ጋላቴቴ ኣቴን ዬላያባይኔ ኤያ ኦዲ ዋይኮ ቁዴይ ሂንቴው ቤሶና ጊሾ ሂንቴ ጊደን ኡባካ ዳዖፖ። 5 ሃይሳ ኤሪቴ፤ ኦኒካ ላይማቴይ ዋይኮ ቱናባ ኦሊይ ዋይኮ ኡዜቴይ ከሪሰቶሳ ካዋቴላኔ ያሳ ካዋቴላ ላታናው ዳንዳዔና። ኡዜቴላ ኤቃ ጎይኖ ማላ።

6 ሃይሳታ ጋሶን ያሳ ሃንቆይ ከቴቶና ኣሳ ቦላ ያና ጊሾ ኦኒካ ሂንቴና ፓሶና ኦዳን ጨሞፎ። 7 ሄሳ ማላ ኣሳራ ኢሲፊቴላ ኦሎፊቴ። 8 ካሴ ሂንቴ ቋማን ዳዒዳታ፣ ሺን ሃዒ ጎዳ ባጋራ ፖዖን ዳዒታ። ሂዛ፣ ፖዖ ኣሳዳ ፖዖን ሲማሬቴቴ። 9 ፖዖይ ሎዖቴላ፣ ፂሎቴላኔ ቱማቴላ ኣይፊሰ።

10 ጎዳ ኡፋይሲያባ ኦላናው ኮዪቴ። 11 ጎዒ ባይና ቋማ ኦሶ ቆንጨሲቴቴ ኣቴን ኢያራ ኢሲፎፒቴ። 12 ኤንቴ ጌማን ኦሊያ ኦሱዋ ሃሪ ኣቶሺን ኦዳናዉካ ዬላዬሰ። 13 ሺን ኡባባይ ፖዖን ኬያ ዋዴ ቆንጨን ቤንቴሰ። 14 ፖዖይ ኡባባ ቆንጨን ቤሴሰ። ሄሳ ጊሾ።

4:25 ዛካ 8:16 4:26 ማዛ 4:4 4:32 ቆላ 3:13 5:2 ኬሳ 29:18፤ ማዛ 40:6

«ኔኖ ጲስኬይሶ ባርካ፤
ሃይቆፕ ዴንዳ፤

ኪሪሰቶሲ ኔ ቦላ ፖዓና» ያጌተሰ።

15 ሃዛ፡ ሃንቴ ዋኒዲ ዳዒያኮ ኣኬኪ ቤዒቴ። ጨንጨታ ጊዲቴፕ ኣተን ኤያታ ጊዶፕቴ። 16 ላይላይ ኢታ ጊዲያ ጊሾ ኢንጃቴያ ዎዴ ኡባ ጎዔቴቴ። 17 ሃሳ ጊሾ፡ ጎዳ ሼኔይ ኣይቤኮ ኣኬኪቴፕ ኣተን ኤዮፕቴ።

18 ጌሻ ኣያናን ጋላስ ጋላስ ኩሚቴፕ ኣተን ጳዮኮ ሃንቴና ካሌሊያ ጊሾ ዎይኔ ኡሻን ማሉቶፊቴ። 19 ማዘሙሬን፡ ሳባኒኔ ኣያና ዬላን፡ ኢሶይ ኢሱዋራ ኦዴቴቴ። ቃሲ ሃንቴ ዎዛናን ዛማሪሼኔ ሳቢሼ ጎዳ ጋላቴቴ። 20 ኑ ጎዳ ዬሱስ ኪሪሰቶሳ ሱንሳን ኡባ ዎዴ ያሳ ኣዋ ኡባባስ ጋላቴቴ።

21 ኪሪሰቶሳ ቦንቐዋስ ጊዲ ኢሶይ ኢሱዋስ ሃሬቴቴ።

ኣዚናባኔ ማቐባ

22 ማቐቶ፡ ጎዳስ ሃሬቴይሳዳ ሃንቴ ኣዚናታስ ሃሬቴቴ።

23 ኪሪሰቶሲ ዎሳ ኬላስ ሁዔ ጊዴይሳዳ ኣዚኒካ ባ ማቐስ ሁዔ። ቃሲ ኪሪሰቶሲ ባ ኣሳቴሉ ጊዲዳ ዎሳ ኬላ ኣሽይሳ። 24 ሺን ዎሳ ኬላይ ኪሪሰቶሳስ ሃሬቴይሳዳ ማቐቴ ባንታ ኣዚናታስ ኡባባን ሃሬታናው ቤሴስ።

25 ኣዚናቶ፡ ኪሪሰቶሲ ዎሳ ኬላ ዶሲዲ ባና ኢው ኢሚዳይሳዳ ሃንቴካ ሃንቴ ማቐታ ዶሲቴ። 26 ኢ ዎሳ ኬላ ባ ቃላ ባጋራ ሃላን ሜጨዲ ጌሺስ። 27 ኪሪሰቶሲ ዎሳ ኬላ ቂቴ ዎይኮ ሶምዎ ቱሲ ዎይኮ ሃሳ ሜላባይ ባይና ኢ ኩሜላ ቦንቐዋራ ጌሺኔ ቦራቶናሮ ኦሊዲ ባኮ ሺሻናው ኮዪዲ ሃሳ ኦሊስ። 28 ሃሳዳካ፡ ኣዚናቴ ባንታና ዶሴይሳዳ ባንታ ማቐታ ዶሳናው ቤሴስ። ባ ማቐው ዶሴይሲ ባና ዶሴስ። 29 ባና ኢዲያ ኣሲ ኢኒካ ባዋ፡ ሺን ኪሪሰቶሲ ዎሳ ኬላስ ኦሌይሳዳ ባ ኣሳቴላ ሙኩሲኔ ናጌስ። 30 ኑኒ ኪሪሰቶሳ ኣሳቴላ ቢሊቴታ።

31 ያሳ ቃላይ፡ «ሃሳ ጊሾ፡ ኣሲ ባ ኣዋኔ ባ ኣዪው ኣጊዲ፡ ባ ማቐራ ኢሲፊ ዳና፤ ኤንቴ ናምዓይካ ኢሲ ኣሾ ጊዳና» ያጌስ።

32 ሃይሲ ጌታ ፀራ፡ ሺን ታኒ ሃሳ ኪሪሰቶሳባኔ ዎሳ ኬላባ ለሚሶ ኦላዳ ኦዳይስ። 33 ጊዶሺን፡ ሃንቴ ኢሶይ ኢሶይ ሃንቴ

ማቼታ ሂንቴ፣ ሂንቴና ደሴይሳዳ ደሲቴ። ኢሲ ኢሲ ማቻ ባ ኣዚና ቦንቻናው ቤሴስ።

6

ናይታባኔ ዩሊዳይሳታባ

1 ናይቶ፣ ሂንቴ ጎዳባ ገዲያ ገሾ ሂንቴና ዩሊዳይሳታሰ ኪቴቴ። ሄሲ ሂንቴው ቤሲያባ። 2 «ኔ ኣዩዉኔ ኔ ኣዋ ቦንቻ።» ሄሲ ኡፋይሳ ቃሊ ዳዒያ ኮይሮ ኪታ። 3 «ኔ ሄሳ ፖሊያባ ገዲኮ ኡባይ ኔው ኢንጃታና፤ ኔ ላይላይ ሳባ ቦላ ኣዲቃና።»

4 ኣዋቶ፣ ሂንቴ ናይታ ጎዳ ቃላ ታማርሶኒኔ ኤንታ ካሌሶን ዲቺቴ፤ ኣቲን ኤንታና ጫሚሶፒቴ።

ጎዳታባኔ ኣይሌታባ

5 ኣይሌቶ፣ ኪሪሰቶሳሰ ኪቴቴይሳዳ ሂንቴ ሳባ ጎዳታሰ ያሻገን፣ ቦንቻኒኔ ሱሬ ዋዛናን ኪቴቴ። 6 ኤንታ ሲንላን ሳባ ዳማናው ኤንቲ ቤዒያ ዋዳ ፃላላ ኦሎፊቴ። ሺን ኪሪሰቶሳ ኣይሌታዳ ያሳ ሼኒያ ዋዛና፤ ፖሊቴ። 7 ኣሳሰ ገደናሺን ጎዳሰ ገዲ ሂንቴ ኩሜላ ዋዛና፤ ኦሊቴ። 8 ኣይሌ ገዲን ዋይኮ ጎዳ ገዲን ኢሶይ ኢሶይ ባ ኦሊዳ ሎዎ ኦሎቀሰ ጎዳ፤ ዋይቶ ኤካናይሳ ኤሬታ።

9 ጎዳቶ፣ ኣሳ ሶዎዎ ቤዒዲ ማደና ጎዳይ፣ ሳሉዋን ዳዒይሳ ኤሬታ። ሄሳ ገሾ፣ ሂንቴ ኣይሌታ ማንዳይሳ ኣገዲ ኤንቲ ሂንቴው ቦንቻን ኪቴቴይሳ ሜላ ሂንቴ ኤንታው ሎዎባ ኦሊቴ።

ያሳ ኦላ ሚሼታ

10 ዉርሴላን፣ ጎዳኒኔ ኢያ ገታ ዋልቃን ሚኒቴ። 11 ፃላሂ ጨሙዋ ኤቁታናው ዳንዳባና ሜላ ያሳይ ሂንቴው ኢሚዳ ኦላ ሚሼያ ኡባ ማዒቴ። 12 ኦ ኦላይ ኣሳራ ገደናሺን ሳሎን ዳዒያ ቱና ኣያና ኦላንቻታራ፣ ማታ ኣዋታራ፣ ሃሬይሳታራኔ ሃ ጵማ ኣላሚያ ዋልቃታራ።

13 ሄሳ ገሾ፣ ኢታ ጋላሳ ቱቃናዉኔ ኡባ ፖሊዲ፣ ሚኒዲ ኤቃናው ሂንቴ ዳንዳባና ሜላ ያሳ ኦላ ሚሼታ ኡባ ማዒቴ። 14-15 ቱማ ፃሳን ዳንጮዳ ዳንጪዲ፣ ፃሎቴሳ ፀራሬዳ ቲራን ዋሊዲ፣ ሳርቴሳ ዋንጌላ ሂንቴ ቶሁዋን ጫማዳ ኣሊዲ ሚኒዲ ኤቁቴ። 16 ሄ ኡባፌ ኣሊዲ፣ ፃላሂይ ዩዲያ ላፂያ ታማ ደንጌ

6:1 ቆላ 3:20 6:2 ኪሳ 20:12፤ ዛሬ 5:16 6:4 ቆላ 3:21 6:5 ቆላ 3:22-25 6:9 ቆላ 4:1፤ ዛሬ 10:17፤ ቆላ 3:25 6:14-15 ኢሳ 11:5፤ ኢሳ 59:17፤ 52:7

ኡባ ቶይሳናው ዳንዳዊያ አማኑዋ ኡባ ዋዴ ጎንዳሌዳ ኦይኪቴ።
17 ያሳ አቶቴላ ቢራታ ባርኔፃዳ ሂንቴ ሁዔን ዋሊቴ፤ ቃሲ ጌሻ
አያና ማሻ፣ አካ ያሳ ቃላ ኦይኪቴ። 18 ዋሳ አጎፊቴ፤ ሃራታሰካ
ጋናቴቴ፤ ኡባ ዋዴ አያናን ዋሲቴ። ሄሳን፣ ጌሻታሰ ሳሌቶና ሚኒዲ
ኡባ ዋዴ ዋሲቴ።

19 ታኒ ዋንጌላ ፀራ ያሺ ባይና ቆንጨሳዳ ኦዳና ሜላ ያሳይ
ታው ቃላ አማና ሜላ ዋሲቴ። 20 ታኒ ሄሳ አላናው ኪቴታሰ
ሃዒካ ቃሾን ዴዔይ ሄ ዋንጌላ ጊሾሳ። ያኒያ ጊሾ፣ ታኒ ያሺ
ባይና ቤሴይሳዳ ኦዳና ሜላ ታው ዋሲቴ።

ወርሴላ ሳርሳ

21 ታኒ ዋና ዴዒያኮኔ አይ ኦሊያኮ ሂንቴ ኤራና ሜላ ኑ ሲቆ
አሻይ፣ ጎዳ ኦሱዋን አማኔቴዳ ኦሳንቸይ፣ ቲኪቆሲ፣ ታባ ኡባ
ሂንቴው ኦዳና። 22 ኑኒ ኡባይ ዋኒዲ ዴዒያኮ ሂንቴው ኦዳና
ሜላኔ ሂንቴና ሚንፊላና ሜላ ታኒ አያ ሂንቴኮ ኪታሰ።

23 ያሳ አዋፔ፣ ጎዳ ዩሱሰ ኪሪሰቶሳፔ ሳርቴላይኔ ሲቆይ
አማኖራ ኢሲፌ አማኒያ ኡባሰ ጊዶ። 24 አርዖና ሲቆን ኑ ጎዳ
ዩሱሰ ኪሪሰቶሳ ሲቂያ ኡባራ ያሳ አዶ ከሃቴላይ ጊዶ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source
files dated 29 Jan 2022

c35d6c73-3843-5482-b53e-7559d35deee5